

全唐诗卷五百三十五

卷 535_1

【汉水伤稼】许浑

西北楼开四望通，残霞成绮月悬弓。
江村夜涨浮天水，泽国秋生动地风。
高下绿苗千顷尽，新陈红粟万廩空。
才微分薄忧何益，却欲回心学钓翁。

卷 535_2

【送王总下第归丹阳】许浑

秦楼心断楚江湄，系马春风酒一卮。
汴水月明东下疾，练塘花发北来迟。
青芜定没安贫处，黄叶应催献赋诗。
凭寄家书为回报，旧乡还有故人知。

卷 535_3

【南阳道中】许浑

月斜孤馆傍村行，野店高低带古城。
篱上晓花斋后落，井边秋叶社前生。
饥乌索哺随雏叫，乳犊慵归望犊鸣。
荒草连天风动地，不知谁学武侯耕。

卷 535_4

【破北虏太和公主归宫阙】许浑

毳幕承秋极断蓬，飘飘一剑黑山空。
匈奴北走荒秦垒，贵主西还盛汉宫。
定是庙谟倾种落，必知边寇畏骁雄。
恩沾残类从归去，莫使华人杂犬戎。

卷 535_5

【李定言自殿院衔命归阙，拜员外郎迁右史因寄】许浑

白笔南征变二毛，越山愁瘴海惊涛。
才归龙尾含鸡舌，更立螭头运兔毫。
阊阖欲开宫漏尽，冕旒初坐御香高。
吴中旧侣君先贵，曾忆王祥与佩刀。

卷 535_6

【早秋韶阳夜雨】许浑

宋玉含凄梦亦惊，芙蓉山响一猿声。
阴云迎雨枕先润，夜电引雷窗暂明。
暗惜水花飘广槛，远愁风叶下高城。
西归万里未千里，应到故园春草生。

卷 535_7

【将为南行陪尚书崔公宴海榴堂】许浑

朝宴华堂暮未休，几人偏得谢公留。
风传鼓角霜侵戟，云卷笙歌月上楼。
宾馆尽开徐稚榻，客帆空恋李膺舟。
谩夸书剑无知己，水远山长步步愁。

卷 535_8

【赠王山人】许浑

贯酒携琴访我频，始知城市有闲人。
君臣药在宁忧病，子母钱成岂患贫。
年长每劳推甲子，夜寒初共守庚申。
近来闻说烧丹处，玉洞桃花万树春。

卷 535_9

【宣城崔大夫召联句，偶疾不获赴因献】许浑

心慕知音命自拘，画堂闻欲试吹竽。
茂陵罢酒惭中圣，漳浦题诗怯大巫。
髻鬣几年伤在藻，羽毛终日羨栖梧。
还愁旅棹空归去，枫叶荷花钓五湖。

卷 535_10

【赠郑处士】许浑

道傍年少莫矜夸，心在重霄鬓未华。
杨子可曾过北里，鲁人何必敬东家。
寒云晓散千峰雪，暖雨晴开一径花。
且卖湖田酿春酒，与君书剑是生涯。

卷 535_11

【正元（一作元日，一作元正）】许浑

高揭鸡竿辟帝阍，祥风微暖瑞云屯。
千官共削奸臣迹，万国初衔圣主恩。
宫殿雪华齐紫阁，关河春色到青门。
华夷一轨人方泰，莫学论兵误至尊。

卷 535_12

【登尉佗楼】许浑

刘项持兵鹿未穷，自乘黄屋岛夷中。
南来作尉任嚣力，北向称臣陆贾功。
箫鼓尚陈今世庙，旌旗犹镇昔时宫。
越人未必知虞舜，一奏薰弦万古风。

卷 535_13

【韶州驿楼宴罢】许浑

檐外千帆背夕阳，归心杳杳鬓苍苍。
岭猿群宿夜山静，沙鸟独飞秋水凉。
露堕桂花棋局湿，风吹荷叶酒瓶香。
主人不醉下楼去，月在南轩更漏长。

卷 535_14

【和淮南王相公与宾僚同游瓜洲别业，题旧书斋】许浑

碧油红旆想青衿，积雪窗前尽日吟。
巢鹤去时云树老，卧龙归处石潭深。
道傍苦李犹垂实，城外甘棠已布阴。
宾御莫辞岩下醉，武丁高枕待为霖。

卷 535_15

【送卢先辈自衡岳赴复州嘉礼二首】许浑

名振金闺步玉京，暂留沧海见高情。
众花尽处松千尺，群鸟喧时鹤一声。
朱阁簾凉疏雨过，碧溪船动早潮生。
离心不异西江水，直送征帆万里行。
湘南诗客海中行，鹏翅垂云不自矜。
秋水静磨金镜土，夜风寒结玉壶冰。
万重岭峤辞衡岳，千里山陂问竟陵。
醉倚西楼人已远，柳溪无浪月澄澄。

卷 535_16

【哭杨攀处士】许浑

先生忧道乐清贫，白发终为不仕身。
嵇阮没来无酒客，应刘亡后少诗人。
山前月照荒坟晓，溪上花开旧宅春。
昨夜回舟更惆怅，至今钟磬满南邻。

卷 535_17

【宿松江驿却寄苏州一二同志（一作宿望亭驿寄苏州同游）】许浑

候馆人稀夜自长，姑苏台远树苍苍。
江湖潮落高楼迥，河汉秋归广簾凉。
月转碧梧移鹊影，露低红叶湿萤光。
西园诗侣应多思，莫醉笙歌掩画堂。

卷 535_18

【卢山人自巴蜀由湘潭归茅山因赠】许浑

太乙灵方炼紫荷，紫荷飞尽发皤皤。
猿啼巫峡晓云薄，雁宿洞庭秋月多。
导引岂如桃叶舞，步虚宁比竹枝歌。
华阳旧隐莫归去，水没芝田生绿莎。

卷 535_19

【颍州从事西湖亭宴饯】许浑

西湖清宴不知回，一曲离歌酒一杯。
城带夕阳闻鼓角，寺临秋水见楼台。
兰堂客散蝉犹噪，桂楫人稀鸟自来。
独想征车过巩洛，此中霜菊绕潭开。

卷 535_20

【瓜洲留别李诩】许浑

泣玉三年一见君，白衣憔悴更离群。
柳堤惜别春潮落，花榭留欢夜漏分。
孤馆宿时风带雨，远帆归处水连云。
悲歌曲尽莫重奏，心绕关河不忍闻。

卷 535_21

【余谢病东归，王秀才见寄，今潘秀才南棹奉酬】许浑

酷似牢之玉不如，落星山下白云居。
春耕旋构金门客，夜学兼修玉府书。
风扫碧云迎鸂鶒，水还沧海养嘉鱼。
莫将年少轻时节，王氏家风在石渠。

卷 535_22

【献韶阳相国崔公】许浑

一匱为功极九层，康庄犹自剑棱棱。
舟回北渚经年泊，门接东山尽日登。
万国已闻传玉玺，百官犹望启金滕。
贤臣会致唐虞世，独倚江楼笑范增。

卷 535_23

【郡斋夜坐寄旧乡二侄】许浑

千官奉职袞龙垂，旅卧淮阳鬓日衰。
三月已乖棠树政，二年空负竹林期。
楼侵白浪风来远，城抱丹岩日到迟。
长欲挂帆君莫笑，越禽花晚梦南枝。

卷 535_24

【病间寄郡中文士】许浑

卢橘含花处处香，老人依旧卧清漳。
心同客舍惊秋早，迹似僧斋厌夜长。
风卷翠帘琴自响，露凝朱阁簟先凉。
明朝欲醉文中彦，犹觉吟声带越乡。

卷 535_25

【贺少师相公致政】许浑

六十悬车自古稀，我公年少独忘机。

门临二室留侯隐，棹倚三川越相归。
不拟优游同陆贾，已回清白遗胡威。
龙城凤沼棠阴在，只恐归鸿更北飞。

卷 535_26

【题崔处士山居】许浑

坐穷今古掩书堂，二顷湖田一半荒。
荆树有花兄弟乐，橘林无实子孙忙。
龙归晓洞云犹湿，麝过春山草自香。
向夜欲归心万里，故园松月更苍苍。

卷 535_27

【疾后与郡中群公宴李秀才】许浑

强留佳客宴王孙，岩上馀花落酒樽。
书院欲开虫网户，讼庭犹掩雀罗门。
耳虚尽日疑琴癖，眼暗经秋觉镜昏。
莫引刘安倚西槛，夜来红叶下江村。

卷 535_28

【晨起白云楼寄龙兴江淮上人兼呈窦秀才】许浑

兹楼今是望乡台，乡信全稀晓雁哀。
山翠万重当槛出，水华千里抱城来。
东岩月在僧初定，南浦花残客未回。
欲吊灵均能赋否，秋风还有木兰开。

卷 535_29

【宴钱李员外】许浑

病守江城眼暂开，昔年吴越共衔杯。
膺舟出镇虚陈榻，郑履还京下隗台。
云叶渐低朱阁掩，浪花初起画樯回。
心期解印同君醉，九曲池西望月来。

卷 535_30

【酬钱汝州】许浑

白雪多随汉水流，谩劳旌旆晚悠悠。
笙歌暗写终年恨，台榭潜消尽日忧。
鸟散落花人自醉，马嘶芳草客先愁。
怪来雅韵清无敌，三十六峰当庾楼。

卷 535_31

【将归姑苏南楼饯送李明府】许浑

无处登临不系情，一凭春酒醉高城。
暂移罗绮见山色，才驻管弦闻水声。
花落西亭添别恨，柳阴南浦促归程。

前期迢递今宵短，更倚朱阑待月明。

卷 535_32

【和浙西从事刘三复送僧南归】许浑

楚客送僧归故乡，海门帆势极潇湘。
碧云千里暮愁合，白雪一声春思长。
满院草花平讲席，绕龕藤叶盖禅床。
怜师不得随师去，已戴儒冠事素王。

卷 535_33

【送上元王明府赴任（一作送友人浙西任宰）】许浑

莫言名重懒驱鸡，六代江山碧海西。
日照蒹葭明楚塞，烟分杨柳见隋堤。
荒城树暗沉书浦，旧宅花连罨画溪。
官满定知归未得，九重霄汉有丹梯。

卷 535_34

【送沈卓少府任江都（一作赵嘏诗）】许浑

炀帝都城春水边，笙歌夜上木兰船。
三千宫女自涂地，十万人家如洞天。
艳艳花枝官舍晚，重重云影寺墙连。
少年作尉须兢慎，莫向楼前坠马鞭。

卷 535_35

【酬邢杜二员外】许浑

雪带东风洗画屏，客星悬处聚文星。
未归嵩岭暮云碧，久别杜陵春草青。
熊轼并驱因雀噪，隼旟齐驻是鸿冥。
岂知京洛旧亲友，梦绕潺湲江上亭。

卷 535_36

【经故丁补阙郊居】许浑

死酬知己道终全，波暖孤冰且自坚。
鹏上承尘才一日，鹤归华表已千年。
风吹药蔓迷樵径，雨暗芦花失钓船。
四尺孤坟何处是，阖闾城外草连天。

卷 535_37

【陪宣城大夫崔公泛后池兼北楼宴二首】许浑

陪泛芳池醉北楼，水花繁艳照膺舟。
亭台阴合树初昼，弦管韵高山欲秋。
皆贺虢岩终选傅，自伤燕谷未逢邹。
昔时恩遇今能否，一尉沧洲已白头。
江上西来共鸟飞，剪荷浮泛似轻肥。

王珣作簿公曾喜，刘表为邦客尽依。
云外轩窗通早景，风前箫鼓送残晖。
宛陵行乐金陵住，遥对家山未忆归。

卷 535_38

【留别赵端公】许浑

海门征棹赴龙泂，暂寄华筵倒玉缸。
箫鼓散时逢夜雨，绮罗分处下秋江。
孤帆已过滕王阁，高榻留眠谢守窗。
却愿烟波阻风雪，待君同拜碧油幢。

卷 535_39

【寄阳陵处士（一作寄昭亭杨处士，一作寄陵阳元处士）】许浑

旧隐青山紫桂阴，一书迢递寄归心。
谢公楼上晚花盛，扬子宅前春草深。
吴岫雨来溪鸟浴，楚江云暗岭猿吟。
野人宁忆沧洲畔，会待吹嘘定至音。

卷 535_40

【与张道士同访李隐君不遇】许浑

千岩万壑独携琴，知在陵阳不可寻。
去辙已平秋草遍，空斋长掩暮云深。
霜寒橡栗留山鼠，月冷菰蒲散水禽。
唯有西邻张仲蔚，坐来同怆别离心。

卷 535_41

【闻州中有宴寄崔大夫兼简邢群评事】许浑

箫管筵间列翠蛾，玉杯金液耀金波。
池边雨过飘帷幕，海上风来动绮罗。
颜子巷深青草遍，庾君楼迥碧山多。
甘心不及同年友，卧听行云一曲歌。

卷 535_42

【寄殷尧藩先辈】许浑

十载功名翰墨林，为从知己信浮沈。
青山有雪谙松性，碧落无云称鹤心。
带月独归萧寺远，玩花频醉庾楼深。
思君一见如琼树，空把新诗尽日吟。

卷 535_43

【赠河东虞押衙二首】许浑

长剑高歌换素衣，君恩未报不言归。
旧精鸟篆谙书体，新授龙韬识战机。
万里往来征马瘦，十年离别故人希。

生平志气何人见，空上西楼望落晖。
吴门风水各萍流，月满花开懒独游。
万里山川分晓梦，四邻歌管送春愁。
昔年顾我长青眼，今日逢君尽白头。
莫向尊前更惆怅，古来投笔尽封侯。

卷 535_44

【陵阳春日（一作移摄太守寄汝洛旧游）】许浑

百年身世似飘蓬，泽国移家叠嶂中。
万里绿波鱼恋钓，九重青汉鹤愁笼。
西池水冷春岩雪，南浦花香晓树风。
纵倒芳尊心不醉，故人多在洛城东。

卷 535_45

【酬杜补阙初春雨中舟次横江喜裴郎中相迎见寄】许浑

江馆维舟为庾公，暖波微渌雨濛濛。
红桥迤邐春岩下，朱旆联翩晓树中。
柳滴圆波生细浪，梅含香艳吐轻风。
郢歌莫问青山吏，鱼在深池鸟在笼。

卷 535_46

【送张厚浙东谒丁常侍（一作送张厚浙东修谒）】许浑

凉露清蝉柳陌空，故人遥指浙江东。
青山有雪松当涧，碧落无云鹤出笼。
齐唱离歌愁晚月，独看征棹怨秋风。
定知洛下声名士，共说膺门得孔融。

卷 535_47

【酬副使郑端公见寄】许浑

一日高名遍九州，玄珠仍向道中求。
郢中白雪惭新唱，涂上青山忆旧游。
笙磬有文终易别，珠玑无价竟难酬。
柳营迢递江风阔，夜夜孤吟月下楼。

卷 535_48

【酬绵州于中丞使君见寄】许浑

故人书信越褒斜，新意虽多旧约赊。
皆就一麾先去国，共谋三径未还家。
荆巫夜隔巴西月，郢郢春连汉上花。
半月离居犹怅望，可堪垂白各天涯。